

Téereb Yonent Yàlla Ose

¹ Kàddug Aji Sax jii moo dikkaloon Ose, góor giy doomu Beeri, ci janti buuri Yuda, Osiyas, ak Yotam ak Axas ak Esekiya, ak ci janti buurub Israyil Yerbowam doomu Yowas.

Njabootu Ose misaal la

² Ba Aji Sax ji tàmbalee yóbbante Ose kàddoom, Aji Sax ji da ne ko: «Demal takki jabaru gàncc, nga am ca doomi ngànctu, ndax réew maa ngi gànctu ngànctu gu réy, dëddu ma man Aji Sax ji.» ³ Ose dem takki Gomer doomu Diblayim. Mu ëmb, gannaaw gi mu am doom ju góor.

⁴ Aji Sax ji ne ko: «Tudde ko Yisreel*. Des na tuuti dinaa mbugal askanu buur Yewu ndax deret ji ñu tuur ci Yisreel. Dinaa jeexal nguurg Israyil. ⁵ Su bés baa maay damm ngànnayaayu Israyil ca xuru Yisreel.»

⁶ Mu dellu ëmb, gannaaw gi mu am doom ju jigéen. Aji Sax ji ne: «Tudde ko Lo Ruwana» (mu firi Ki ñu yérémul), mu ne: «ndax dootuma yérém waa kér Israyil, dootuma leen baal.

⁷ Waaye waa kér Yuda, maa leen di yérém. Seen Yàlla Aji Sax ji laa leen di walloo, waaye duma leen walloo fitt mbaa saamar, mbaa ay xare, mbaa ay fas aki gawar.»

* ^{1:4} 1.4 Xuru Yisrellañuy misaale deret ju wale, ndax lañu fa bómnoon ñu bare. Seetal ci 2.Buur ya 9.7-10.31.

⁸ Ba Gomer feralee Lo Ruwana, ëmbaat na, ba am doom, muy góor. ⁹ Aji Sax ji ne ko: «Tudde ko Lo Ami» (mu firi Du sama ñoñ), mu ne: «ndax dungeen sama ñoñ, te man duma seen dara.»

2

Aji Sax jeey dalalaat ñoñam

¹ «Du tere askanu Israyil tollu ni suufas géej. Deesu ko mana natt mbaa di ko waññ, te foofa ñu leen noon: "Yeen, dungeen sama ñoñ," fa lees leen naa: "Yeenay doomi Yàlla jiy dund." ² Askanu Yuda ak askanu Israyil dañuy dellu booloo, daldi tabbal seen bopp genn kilifa, te dinañ sëq ci réew mi, ndax bésub Yisreel ba dina réy. ³ Nanga wooye sa bokk yu góor: "Ñoñi Aji Sax ji," sa bokk yu jigéen, nga ne leen: "Ñi Aji Sax ji yérëm."

Ab layoo rax na kàddug tinu ci Israyil

⁴ «Tiiñal-leen seen ndey, tiiñal-leen ko, ndax moom du sama jabar, te man duma jëkkëram.

Nee ko mu bàyyi gànctu te noppee tegoo màndargam njaaloo.

⁵ Lu ko moy ma futti ko ba mu ne duñj, def ko ni bés ba mu juddoo, melal ko ni mändij.

Maa koy def ni joor gu wow, marloo ko ba rey ko.

⁶ Ay doomam, duma leen yérëm, nde doomi ngànctu lañu.

⁷ Ñoom seen yaay moo gànctu,

ki leen ëmb moo def lu gàccelu,
naan: "Damay toppi sama far,
yi may jox sama lekk ak samag naan,
ak samag wëñ ak sama lëe
ak samag diw ak sama biiñ."

⁸ «Moo tax maa ngii di ñage yoonam ay dég,
gawe ko ag wurmbal,
ba yoon réer ko.

⁹ Mooy topp ay faram te du leen dab;
mu seet leen, du leen gis.
Su boobaa mu ne: "Naa dellu
ca saa jékkér ju jékk ja,
nde ca laa gënoonu demin."

¹⁰ Moom xamul woon ne man maa ko doon jox
pepp meek biiñ bu bees beek diw gi,
di ko yéwéne xaalis ak wurus,
ñu di ko jaamoo Baal.

¹¹ Kon nag fa ngóob jote laay nangoo sama pepp,
fa wittum reseñ jote it laay nangoo
sama biiñ bu bees,
maay foqati sama wëñ ak sama lëe,
ba mu daan sànge yaramam.

¹² Léegi maa koy futti, mu ne dunñj,
ay faram di gis,
te kenn du ko xettli ci sama loxo.

¹³ Maay dakkal gépp mbéxam;
ay màggalam, ay Terutel weeram,
ay bési Noflaayam, ak mboolem bési nda-
jeem.

¹⁴ Maay fóom garabi reseñam aki figgam,
yi mu noon: "Lii sama peyoor la!
Samay far a ma ko jox."

Maa koy def ay dédd,
rabi àll yi di ko lekk.

¹⁵ Maa koy feyu bési màggal yu tuuri Baal,
ya mu leen daan taalale cuuraay,
takk ay jaarooki gànjar,
toppiy faram, fàtte ma.»
Kàddug Aji Sax jee.

Aji Sax ji sàkkuwaat na cofeelu Israyil

¹⁶ «Moo tax maa ngii di ko naxtaan,
maa koy yóbbu ca màndij ma,
ba déey ko lu xolam dégg.

¹⁷ Foofa laa koy delloo tóokëri reseñam,
defal ko xuru Akor* di buntu yaakaaram.
Fa la may feeloo na woon
ca janti ndawam,
ba muy génn réewum Misra.

¹⁸ Bésub keroog,» kàddug Aji Sax jee,
«Ca nga may wooye “Sama jékkér,”
te dootoo ma wooye “Sama Baal.”»

¹⁹ Turi tuuri Baal laay jèle ci sa gémmiñ,
ba deesatul fàttliku seen tur.

²⁰ Bésub keroog maa leen di fasal kóllëre
ak rabi àll yeek njanaaw yi,
ak ndëgmeent yi.

Fitt ak saamar akub xare it,
maa koy dagge ci réew mi,
te maa leen di may téraayu jàmm.

²¹ «Yaw laay digool ba fàww, ab séy,
te njekk ak njub ak ngor ak yërmande

* **2:17** 2.17 xuru Akor mooy xuru Musiba. Seetal ci Yosuwe 7.24-26.

ci laay digook yaw ab séy.
 22 Ci kóllére laay digook yaw ab séy,
 ba nga xam Aji Sax ji.
 23 Bésub keroog, maay nangu,»
 kàddug Aji Sax jee,
 «maay nangul asamaan,
 moom, mu nangul suuf;
 24 suuf nangul pepp ak biiñ ak diw,
 ñu bokk nangul Yisreel.
 25 Maa koy jémbatal sama bopp ci réew mi,
 maay yérém ki tuddoon “Ki ñu yérémul.”
 Ki tuddoon “Du sama ñoñ,”
 ma ne ko: “Yaay sama ñoñ,”
 moom mu ne ma: “Sama Yàlla.”»

3

Aji Sax ji xiir na Israyil ci cofeel

¹ Aji Sax ji ne ma: «Demaatal bëggi jigéen ju faram bëgg, te muy moykat. Bëgg ko ni Aji Sax ji bëgge bànni Israyil, doonte dañuy walbatiku ci yeneen yàlla te bëgg seen saraxi nàkki reseñ.»

² Ci kaw loolu ma takk ko ci fukki poseti xaalis ak juróom, ak ñeenti téeméeri kiloy lors ak juróom fukk (450). ³ Ma ne ko: «Ay fan yu bare ngay toog fi man; bul gànctu, bul ànd ak genn góor. Noonu laay def ak yaw, man itam.» ⁴ Ndax kat ay fan yu bare la bànni Israyil di toog te duñu am buur, duñu am kèngam. Duñu rendi sarax, duñu am tuuri doj, duñu am xar-sànni, duñu am gàllaaji kér. ⁵ Gannaaw loolu bànni Israyil dinañu walbatiku, sàkku seen Yàlla Aji Sax ji, ak Daawuda seen buur. Ca jant yu mujj

ya, xolub ragal Aji Sax ji lañuy dikke fi moom,
akug mbaaxam.

4

Aji Sax ji tiinal na kilifay ñoñam

¹ Yeen banni Israyil, dégluleen kàddug Aji Sax ji,
Aji Sax ji kat moo séq ab layoo ak waa réew mi:
«Du kóllere, du ngor, du gennug ràññee Yàlla
ci réew mi.

² Xanaa ay móolu aki wor, bóome, càcc ak
njaaloo.

Dañoo rakkaaju, di tuur deret ci kaw deret.

³ Moo tax réew mi wowal,
mboolem lu fi dékke ràgg,
ba ci rabi àll yi, ak njanaaw yi,
jëni géej itam day réer.

⁴ «Waaye bu ci kenn layoo,
bu ci kenn sikke,
ndax sa bokk yee mel ni ñuy layook sarxalkat yi.

⁵ Dingeen térëf bëccëg,
yonent yi ànd ak yeen térëf guddi,
te maay sànk seen ndey.

⁶ Sama ñoñ a sàngku ndax ñàkka xam;
yeen, xam-xam ngeen gàntal,
ma gàntal seenug carxal.

Yeena fàtte seen yoonu Yàlla,
man it maay fàtte seeni doom.

⁷ sarxalkat yi ñu gëna baree, gën ma nee moye,
seenub sag, gàcce laa koy soppi.

⁸ Sama saraxi póotum bákkaari ñoñ

- lañuy dunde*,
 tey yàkkamti ñu def njubadi.
- ⁹ Waaye niki askan wi, niki sarxalkat yi,
 maa leen di dikke seen aña jikko,
 maa leen di fey seeni jëf.
- ¹⁰ Ñooy lekk te duñu regg,
 di gànctu te duñu giir,
 nde Aji Sax ji lañu noppee topp.
- ¹¹ Ngànctu ak biñ bu yàgg ak bu bees,
 moo yóbbu seenum xel.
- ¹² Sama ñoñ, seen bant lañuy seeteey,
 seenu yet di leen waxaleey.
 Xelum ngànctu moo leen wacc,
 ñooy gànctu, lajje fa seen Yàlla.
- ¹³ Ca kaw tund yu mag ya lañuy rendee ay sarax,
 cuuraay, ñu taale ca tund yu ndaw ya,
 ak ca taatu gii garab gu mag, ba ca gee,
 fa ker ga neexe.
- Moo tax seeni doom di gànctu,
 seen séeti doom di jaaloo.
- ¹⁴ Duma mbugal seeni doom
 ndax li ñuy gànctu
 mbaa seen séeti doom
 ndax li ñuy jaaloo,
 ndax ñoom sarxalkat yi ci seen bopp,
 ay gàncc lañuy teggeendool
 te gàncc yi ci jaamookaayi xérëm yi,
 ñoom lañuy indeendool jooxe.
 Askan wu amul ug dégg, sànsku.
- ¹⁵ «Yeena ngi gànctu, yeen bànni Israyil,

* ^{4:8} 4.8 Seetal ci Sarxalkat yi 6.19-22.

waaye na Yuda mucc ci googu tooñ.

Buleen dugg Gilgal[†],

buleen yéegi Bet Awen[‡]

di giñ ci Aji Sax jiy dund.

¹⁶ Ndegam ni aw nag tewe ni la Israyil tewe,
ndax léegi Aji Sax jee leen di foral
nim xar ci parlu mu ne màww?

¹⁷ Efrayim[§] googu laa ne, moo lengook jëmmi
tuur!

Seetaan leen.

¹⁸ Seenu ñoll giiful sax, ñuy gànctoo gànctu,
te gaccee gënäl seeni kilifa.

¹⁹ Callweer a leen di wal,
ñu kersawoo seen jooxey tuur.

5

Njiiti Israyil lajj nañu

¹ «Dégluleen lii, yeen sарxalkat yi!

Teeyluleen, yeen waa kér Israyil!

Teewluleen, yeen waa kér buur!

Yeen la àtte bi ñeel.

Ag firr ngeen tegoon ca Mispa,
ab caax ngeen laloon ca tundu Tabor,

² Fippukat yi gën nañoo xuus ci seen bóome,
waaye maa leen di yar, ñoom ñépp.

³ Maa xam Efrayim,

Israyil laa ne, umpu ma.

[†] **4:15** 4.15 Gilgal bérab la bu ñu daan bokkaalee, ba tur wi mujj taxawe jikkoy dëddu Aji Sax ji. [‡] **4:15** 4.15 Bet Awen: li mu firi mooy kérug ñaawtéef. Muy tur wu waxi kókkali dendale ak Bet El, tur wi firi Kér Yàlla. [§] **4:17** 4.17 Efrayim, genn la ci giiri Israyil ga ca bëj-gànnhaar, moom la Ose faral di wooye réewum Israyil gépp.

Efrayim, yaa gànctu,
 Israyil laa ne, yaa sobeel sa bopp.
⁴ Seeni jëf a leen mayul ñu dellu ci seen Yàlla,
 nde ngelawal ngànctoo wale fa seen biir,
 te Aji Sax ji, faalewuñu ko.
⁵ Israyil, ag reewandeem a ko tiñal,
 Israyil ak Efrayim ñooy fakktaloo seenug
 ñaawtéef,
 Yuda it ànd ak ñoom fakktalu.
⁶ Seen jur gu gudd ak gu gàtt lañuy àndal,
 di seet Aji Sax ji, duñu ko gis,
 te moo leen dëddu.
⁷ Aji Sax ji lañu wor,
 nde doomi po lañu jur;
 Léegi la leen màggalug Terutel weer
 di booleek seen suuf, sànk leen.

Yàlla dëkk na Israyil ak Yuda.

⁸ «Wal-leen bufta gi ca Gibeya,
 jibal liit gi ca Raama
 te yéene ca Bet Awen*.
 Moytul sa gannaaw, Beñamin.
⁹ Efrayim day gental kera bésu mbugal,
 maa xamle ci biir giiri Israyil lu wér péñj.
¹⁰ Kàngami Yuda mujj mel ni
 ñuy toxal màndargam làccu suuf.
 Ci seen kaw laay yuri samam sànj nim ndox.
¹¹ Efrayim lees di not,
 joggati ay yelleefam,
 nde moo dogoo topp yoonu caaxaan.
¹² Man nag ni ñaawat laay def ak Efrayim,
 te ni sànkcar laay def ak Yuda.

* 5:8 5.8 Seetal 4.15.

¹³ Ba Efrayim gisee jàngoroom,
Yuda gis ab danaam,
Efrayim a dem Asiri,
yónnee ca Buur Yareb[†].
Waaye manu koo wéral,
mbaa di ko fajal ab danaam.

¹⁴ Man déy ni gaynde laay mel ak Efrayim,
ni gaynde gu ndaw laay mel ak waa kér Yuda.
Man, man mii maay xotat, wéy,
maay yóbbu te kenn du wallu.

¹⁵ Ma daldi ñibbi, ba ñu nangu seenug tooñ,
sàkku ma.
Bu ñu jàqee lañuy daw wutsi ma.»

6

Wooteb tuub jib na

¹ Ca ngeen naan: «Nan dellu ci Aji Sax ji.
Moo nu xotat, te moo nuy wéral.
Moo nu duma, te moo nuy takkal sunuy góom.

² Ñaari fan, mu leqli nu,
ñetteel ba mu yékkati nu,
nuy dund fi kanamam.

³ Nan ràññee, di saxoo faale Aji Sax ji.
Ni jant bu fenk la dikkam wóore,
ni ab taw la nuy dikkale,
ni ab tawu mujjantal buy seral suuf.»

⁴ «Ana nu ma lay def, yaw Efrayim?
Nu ma lay def yaw Yuda?
Te sa ngor di xiinu suba,
mbaa ab lay, jekki ne mes.

[†] **5:13** 5.13 Yareb man naa tekki «xeexkat.»

- ⁵ Moo tax yonent yi laa leen di dumaa,
sama kàdduy gémmiñ laa leen di reye.
Seen àttee leen di jollil ni ceeñneeru njël.
⁶ Ndax ngor laa namm, dub sarax,
ràññee Yàllaa ma gënal saraxi rendi-dóomal.

- ⁷ «Waaye ñoom ca dëkk ba, Adam lañu feccee
kóllére,
foofa lañu ma wore.
⁸ Galàdd mooy dëkkub defkati ñaawtéef,
taq ripp ak deret.
⁹ Ni saaysaay siy téroo,
ni la sarxalkat yi lëkkoo,
di bóome ca yoonu Sikem.
Ndaw jëf ju ñaaw!
¹⁰ Ci kërug Israyil laa gis lu yées:
Fa la Efrayim di gànctoo,
Israyil googu laa ne moo sobeel boppam.
¹¹ Yuda yaw it, sam ngóob ma ngay taxawe,
kera bu may tijji sama wërsëgu ñoñ.

7

Israyil mooy mburu mu desee ñor

- ¹ «Bu may faj Israyil
foofu ca Efrayim la seeni ñaawtéef di feeñ,
ànd ak mbonu Samari seen péey.
Dañuy njublanj,
sàcc yi yì bëtt ci biir kér yi,
gàngoori saaysaay di songe ci biti.
² Taxul ñu jàpp ci seenum xel ne
seen mboolem jëf ju bon laa bàyyi xel.
Léegi seeni jëf a leen wër ndombo,
ne màkk fi sama kanam.

³ Seenug mbon lañuy bégale buur,
seeni fen di bégal kàngam.

⁴ Ñoom ñépp a diy jaalookat.

Ñu mel ni taalu mburu bu yànj,
taal bu lakk-kat ba soxlawula xamb,
ca tooyal ba, ba kera xóoy bay funki.

⁵ Bu sunu buur xewlee,
kàngam yi naan ba wopp,
buur tällal loxo ay ñaawlekat.

⁶ Seenub xol lañu waajal nib taal, di téroo,
Seen lakk-katu mburu fanaanee nelaw*,
bët set taal ba yànj, di fér-féri.

⁷ Ñoom ñépp a tàng jérr nib taal,
te ñooy xoyom seeni njiit,
seen buur yépp a daanu,
te kenn ci ñoom woowu ma wall.

⁸ Efrayim moo jaxasook askani jaambur,
Efrayim moo di mburu mu ñu walbatiwul cib
taal.

⁹ Ay doxandéem a jeexal dooleem, te xamu ko,
aw liir tege ci kawam weex täll, te yégu ko.

¹⁰ Israyil, ag reewandeem a ko tiiñal,
te taxul ñu délsi ci seen Yàlla Aji Sax ji.
Loolu yépp taxul ñu sàkku ko.

¹¹ Efrayim daa mel ni pitax,
dofe, ñàkk xel,
di woo wall Misraak a dem Asiri.

¹² Bu ñuy dem, maa leen di laaw samab caax,
niy njanaaw laa leen di woddale fi suuf,
fa ma dégge seenum ndaje laa leen di mbugale.

* **7:6** 7.6 Ki jiite pexe mu bon mi moo fanaanee nelaw ca guddig
xawaare ja, bët set mu jóg, joxe ab tegtal, ngir ñu sottal pexe ma.

¹³ Ngalla ñoom, nde ñoo ma daw,
yàqute ñeel na leen, nde ñoo ma gàntal.
Doon naa leen jot
waaye ñoo ma fenal.

¹⁴ Du seen xol lañu ma wooye wall,
xanaa di salliru ci seen kaw lal,
pepp ak biiñ tax ñuy dagg seen yaram[†],
dëddu ma.

¹⁵ Maa leen jàngal, dëgëral seeni përëg,
te man lañuy fexeel lu bon.

¹⁶ Bu ñu waññikoo it, du fi Aji Kawe ji.
Ni xala gu yolom lañu mel,
te seeni kàngam ay fàddoo saamar
ndax seen sànjum làmmiñ,
te loolu lees leen di reetaane
ca réewum Misra.

8

Ku ji as ngelaw, yaay góob ngélén

¹ «Sexleen bufta gi!

Jaxaay jàyy ci waa kér Aji Sax ji,
nde ñoo fecci sama kólléreek ñoom,
samaw yoon lañu gàntal.

² Man la Israyil xaacu, ne ma:

“Éy sama Yàlla, maa la ràññee!”

³ Israyil a xalab lu baax,
ba ab noon dàq ko.

⁴ Ñoo fal ay buur te du sama ndigal,
ñoo tabb ay kàngam, te yéguma.

[†] **7:14** 7.14 Ñi daan jaamu Baal mi ñu jiiñ ne mooy nangul suuf,
ñoo aadawoo woon di dagg seen yaram, di tuur seen deret ci
suuf, ngir foog ne loolu mooy tax seen mbey nangu.

Seen xaalis ak seen wurus lañu sàkke jëmmi
tuur,
muy seen sànkute.

⁵ Yeen waa Samari, seen jëmmu wëllu wi* dàqu na!

Sama mer tàkkal na leen.

Lu ngeen deeti xaar ci mucc ayib?

⁶ «Israyil la lii jóge,
te ab liggéeykat moo ko sàkk.

Kon lii du Yalla!

Ay tojit la wëlluw Samari di mujje.

⁷ «As ngelaw lañu ji, ñooy góob ngëlén.

Gub du jóg, pepp du focci,

te bu pepp amoon it,

jaambur a koy wonn.

⁸ Dees na wonn Israyil;
tey ñu ngi ci biir xeeti jaambur yi,
mel ni ndab lu kenn buggul.

⁹ Ñoo demal seen bopp Asiri.

Mbaamu àll day beru yoonam,

waaye waa kér Efrayim ñooy jënd ay far.

¹⁰ Ci xeeti jaambur ñi lañuy jënde,
waaye du tee ma dajale leen.

Léegi ñu tegoo notaangey buur aki kèngam.

¹¹ Efrayim a yokk ay sarxalukaay ngir moy,
ñu doon ay sarxalukaayi moyukaay donñ!

¹² Naa ko bindal sama fukki junniy
ndigali yoon,
yëfi jaambur lees koy jàppe.

¹³ Ñooy sarxe jur gi ñu may jooxeel,

* **8:5** 8.5 jëmmu wëllu wi: seetal ci 1.Buur ya 12.25-30.

lekk yàpp wi,
 Aji Sax ji buggu ci dara.
 Maay bàyyi xel ci seen ñaawtéef,
 mbugale leen seeni moy,
 te ñoom Misra lañuy dellu.
¹⁴ Israyil moo fàtte ab sàkk-katam,
 di tabax kér yu yànj.
 Yuda moom yokki dëkk yu tata wër.
 Maay yebal sawara ci kawi dëkkam,
 mu xoyom ay tataam.»

9

Yoonu ngàllög Israyil taxaw na

¹ Yeen waa Israyil, buleen béglu,
 buleen bànnexu ni yeneen xeet yi,
 nde yéena gànctu, dëddu seen Yàlla,
 yéena safoo peyu ngànctu
 ci mboolem dàgga ju ñuy bacce pepp.
² Ndaxam dàgga ak nalukaayu reseñ
 du leen regg,
 te biiñ du leen doy.
³ Dungeen des ci réewum Aji Sax ji.
 Efrayim, Misra lay dellu,
 te ca Asiri, lu daganul lañu fay lekkeji.
⁴ Duñu tuural Aji Sax ji saraxu biiñ,
 te seeni sarax du ko neex.
 Seen ñamu sarax day mel ni ñam
 wu ku nekk fu nit deeye, sobeel,
 ba ku ca lekk sobewu*.
 Seenu ñam, seenub koll lay ñeel,

* **9:4** 9.4 Bokk ag lekk ci néeg bu nit deeye daan na sobeel ña fa lekk. Seetal ci *Màndij ma* 19.14-22.

waaye du dugg ci kér Yàlla gi.

⁵ Ana nu ngeen di def nag, ci bésu ndaje,
bésub màggal bu Aji Sax ji?

⁶ Ñu ngoogu dem ndax tasteg réew mi,
Misraa leen di fat, Memfis suul leen,
seen tånnéefu xaalis, mbooy mee koy nangu,
te xaaxaam ay saxe seen biiri xayma ya woon.

Fexeel nañu yonent yi

⁷ Bési mbugal dikk na,
bési añale taxaw na,
na ko Israyil xam.
Yonent lañu jàppé ab dof,
ku yor waxyu di ku wéradi,
ndax seen ñaawtéef gu réy,
ak seen mbañeel gu tar.

⁸ Yonent bi mooy jongrukat
biy wattul Yàlla, Efrayim,
waaye ag fir lees ko lalal
ci mboolemi yoonam,
te mbañeel a ngi ci biir kér Yàllaam.

⁹ Ñoo sóobu ci xóotey yàqute,
na woon ca janti Gibeya[†],
te Yàlla mooy bàyyi xel seenug ñaawtéef,
ba mbugale leen seeni moy.

Israyil wor na Aji Sax ji

¹⁰ «Ni cabbu reseñu biir màndinj,
ni laa fekke Israyil.
Ni ndoortel doomi figg ju ndey ja taawloo,
ni laa gise seeni maam.

[†] 9:9 9.9 Ca Gibeya lañu bóome woon as ndaw, ba ñu mujj dagg
ko ay dog yu ñu def firnde, yónnee ko bànni Israyil gépp. Seetal
ci Njiit ya 19-21.

Waaye ñoom ñoo dem Baal Pewor,
 ñoo sédd seen bopp Baal, tuur mu ruslu mi,
 ba tax leena seexluwu ni kooku ñu sopp.

¹¹ Efrayim, ab sagam ni picc lay naawe,
 du njurum doom, dub émb, du doom ju sosu sax.

¹² Bu ñu yaroon seeni doom it,
 maa leen leen di xañ,
 ba kenn du des.

Te it ngalla ñoom, bu ma leen dëddoo.

¹³ Ni ma dogule Tir dëkk ba,
 bi jëmbate ci parlu mu naat,
 ni laay dogule Efrayim,
 ba yóbbul ay doomam ab bóomkat.

¹⁴ Aji Sax ji, yool leen!

Ana loo leen di yool?

Yool leen biir yu yàqu,
 ak ween yu ne seren.

¹⁵ «Seen gépp mbon moo feeñ ca Gilgal[‡],
 te fa laa leen jéppée ndax mbonug seeni jëf.
 Sama kér laa leen di dàqe,
 te dootuma leen bëgg,
 seeni njiit yépp a diy fippukat.

¹⁶ Fàddees na Efrayim,
 ay reenam wow,
 du meññ benn doom.
 Bu juroon itam, maay rey
 ngëneelu biiram.»

¹⁷ Sama Yàlla moo leen di xalab,
 nde ñoo ko déggalul,

[‡] **9:15** 9.15 Gilgal mooy dëkk bu ñuy misaale jëfi bokkaale.
 Seetal ci Ose 4.15.

te ñooy taxawaaluji ci biir xeeti jaambur yi.

10

Israyil ñarale na

¹ Israyil di reseñ gu naat,
meññal boppam lu ne gâññ,
te lu meññeef ma gëna yokku,
mu gëna yokkati sarxalukaayi tuur.
Lu am réewam gëna baaxle,
mu gëna baaxal ay xeri tuur.

² Ñooy boroom xolub jinigalkat,
te tey ñooy gàddu seen bakkhaar.
Aji Sax ji mooy toj seeni sarxalukaay,
tas seen xeri tuur.

³ Léegi ñu ne: «Amunu buur,
ndax noo wormaalul Aji Sax ji,
te su nu amoon buur it, lu mu nu manal?

⁴ Ñooy wax seeni wax,
di giñe ay fen yu ñuy fasoo kóllère,
ba yoon mel ni gâncaxu tooke
ju law ca tooboy tool ya.»

⁵ Waa Samaree ngi am tiitaange ci
sëllu wu ñu xelli ca Bet Awen*,
askan wa di tiislü tuur ma,
ay xérémkatam di lox ndax darajay sëllu,
ji leen dëddu, dem ngallo.

⁶ Moom it lees di yóbbu Asiri,
defal ko buur bu mag ba ab galag.
Gàcce mooy jäpp Efrayim,
Israyil laa ne, mooy rus ci mébétam.

⁷ Samari lees di tas, mook buuram,

* **10:5** 10.5 Seetal ci Ose 4.15.

mu mel ni bant buy tëmb di dem.

⁸ Jaamookaay yu kawe ya ca Bet Awen,
bàkkaarukaayi Israyil yooyu lees di tas.
Ay dég aki dagg ñooy sax ca seeni sarxalukaay,
dees na ne tund yu mag yi: «Mëddleen nu,»
te naan tund yu ndaw yi: «Daanuleen ci sunu
kaw.»

⁹ «Israyiloo, ca janti Gibeya[†] nga dala moye,
te foofu la waa réew mi tollu ba tey.

Luy tee xare dabe nit ñu jubadi ñi ca Gibeya?

¹⁰ Saa yu ma soobee ma yar leen.

Ay xeet ay daje, jógäl leen,
jéng leen ndax seen ñaari ñaawtéef.

¹¹ Efrayim aw nag wu nangu la woon,
te sawaroona bàcc am pepp.

Maa ràng loosam wu jekk.

Maa takk Efrayim,
Yuda gabb, Yanqóoba rijjil boppam.

¹² Jiwal-leen seen bopp njekk,
ba góobe ca lu ngor maye.

Gàbbleen ag mbooy,
sàkku Aji Sax ji jot na,
ba kera muy dikk, tawal leen njekk.

¹³ Yeena bey ag coxor,
góob ag mbon.

Yeena lekk meññeefum fen,
nde yeena wóolu seen pexey bopp,
ak seen jàmbaar yu bare.

¹⁴ Am riir mooy jollee ca sa biir gàangoor,
sa tata yépp tas, na Salman tase woon Bet Arbel,
keroog bésüb xare ba,

† **10:9** 10.9 Gibeya: seetal ci *Njiit ya* 19-21.

ba ñu jëlee ndey, fenqaleek doom, ñu rajaxoo.

¹⁵ Noonu lees leen di def, yeen waa Betel
ndax seen mbon gu réy.

Jant a ngay fenk, buurub Israyil dee wett.

11

Cofeel la Aji Sax ji tontoo fippug Israyil

¹ «Maa soppoon Israyil ba muy ndaw,
Fa Misra laa ko wooye, muy sama doom.

² Lu ñu leen gëna woo,
ñu gën maa sore.

Ay tuuri Baal lañuy defal ay sarax,
te ay xërëm lañuy taalal cuuraay.

³ Ndaxam man maa tette Efrayim, fab ko,
te ràññeewuñu ne maa leen topptoo.

⁴ Ay goji nit laa leen ñoddee,
ay buumi cofeel.

Maay ki leen yolomalal ñalaabi ñaam,
sëgg, leel leen.

⁵ Duñu dellu réewum Misra*.

Waa Asiri ñooy doon seen buur,
nde ñoo baña délsi fi man.

⁶ Ab saamar ay wëndeelu ca seen dëkk yu mag,
dàjji seen bunti dëkk,
ba warax leen ndax seeni mëbét.

⁷ Sama ñoñ dañoo làggi ci ñakke ma kóllëre,
wooyees na leen fa kaw,
te kenn ci ñoom jógul.

⁸ «Efrayim, ana nu ma lay baye,
yaw Israyil laa ne, nu ma lay tege ciy loxo?

* **11:5** 11.5 Loolu mooy duñu dellu ci njaam ga ñu nekke woon
ca Misra.

Ana nu ma lay defe ni Atma?
 Nu ma lay yemaleek Ceboylim†?
 Sama xol a bépp,
 sama yërmantee yëngu.
⁹ Duma wéye di tàkkal sama mer,
 duma yàqteeti Efrayim,
 ndax maay Yàlla, duma nit,
 maay Aji Sell ji ci seen biir,
 duma dikke am sànj.
¹⁰ Dees na topp ci gannaaw Aji Sax ji,
 muy yëmmu ni gaynde.
 Mooy yëmmu moos ni gaynde,
 ay doomam di lox, jóge sowu.
¹¹ Ni njanaaw lañuy loxe, jóge Misra,
 mel nim pitax, bawoo Asiri.
 Maa leen di dëël seeni kér.»
 Aji Sax jee ko wax.

12

Aji Sax ji layoo na ak Israyil ak Yuda

¹ «Efrayim, ay fen la ma gawe,
 waa kér Israyil laa ne,
 ñoo ma yéewe ag njublañ,
 waaye Yudaa ngi ànd ak Yàlla ba tey,
 di sàmm kóllereek Ku Sell ki.»
² Efrayim mooy sàmmkatub ngelaw,
 yendoo topp ngelawal penku,
 di yokki fen ak fitna,
 fasoo kóllere ak Asiri,
 yónnee yóbbalu diw ba Misra.

† **11:8** 11.8 Ceboylim ak Atma ñooy ñaari dëkk yu Yàlla boole ak Sodom ak Gomor, dëkk ya ñu dendaloon, tas leen.

³ Aji Sax ji moo séq ak Yuda ab layoo,
mooy mbugale Yanqóoba ay jéfinam,
añale ko ay jéfam.

⁴ Ci biiru ndeyam la kii suufoo ab seexam;
kii moo tollu ci dooleem, bëreek Yàlla.

⁵ Kee bëreek malaaka, ba génn ca,
kee jooy di sàkku aw yiwan.

Fa Betel la ko fekk,
te foofa la Yàlla waxeek nun.

⁶ Aji Sax ji Yàlla Boroom gàngoor yi,
Aji Sax jee di turu bàkkam.

⁷ Yaw nag, ca sa Yàlla nga wara dellu,
ngor ak njub, sàmm ko,
te nga saxoo yaakaar sa Yàlla.

⁸ Ni Kanaaneen biy jula, ni la Efrayim
yore mändaxekaayu njublañ cib loxoom,
bëgga naxe.

⁹ Efrayim a ngi naan: «Woomle naa,
maa amal sama bopp alal,
te mboolem samaw ñaq, giseesu ci
tooñaange ju di bàkkaar.»

¹⁰ «Man Aji Sax ji dale di sa Yàlla ca Misra,
maa lay dëëlaat ciy xayma,
na woon ca bésub ndaje.

¹¹ Maa wax ak yonent yi,
yokk peeñu yi,
te yonent yi, maa leen waxyu ay misaal.»

¹² Su Galàdd dee dëkkub defkati ñaawtéef,
dañoo tekkiwul dara.

Fa Gilgal lees di rendee ay saraxi yékk,
te seeni sarxalukaay ni jali xeer lay mel

ci ay tooboy tool.

¹³ Yanqóobaa dawoon ba réewum Siri,
Israyil laa ne, moo liggeey ngir am jabar,
wut jabar tax koo sàmm ag jur.

¹⁴ Ci loxol yonent la Aji Sax ji génnee Israyil
Misra,

te ab yonent la sàmmloo Israyil.

¹⁵ Waaye Efrayim moomoo ko merloo,
naqaral ko.

Deret ji mu tuur la Boroomam di köpp ci kawam,
añub tooñam la koy fey.

13

Mbugalum fippu ci kaw Aji Sax ji du jaas

¹ Bu Efrayim daan wax, ñépp ay lox;
mu amoon daraja fi digg Israyil.

Waaye moo sikkal boppam ci tuuri Baal,
ba dee.

² Léegi ñu ngi gën di bakkhaar,
di xellee ci seen xaalis jémmu tuur,
ay jémmi xérém yu ñu sàkke seen xareñte,
lépp di càkkéefu ay liggeeykat,
te ci ñoom la nit ñi naan:

«Rendikati sarax yaa ngi fóon ay tuuri
wèllu.»

³ Moo leen tax di naaxsaay ni niiru suba,
mbaa layub njël,
mbaa mboob mu naawe dàgga ja,
mbaa saxar su gillee ci jankub néeg.

⁴ «Man Aji Sax ji, fa Misra laa dale di seen Yàlla,
xamuleen Yàlla ju dul man,
te kenn du musle ku ma moy.

⁵ Man maa leen ràññee ca màndinj ma,
ci biir réewum maral.

⁶ Ngeen wëtti ba regg,
regg, bew, ba tax ngeen fàtte ma.

⁷ Moo tax ma mel ni gaynde ci yeen
di téroo ni segg ciw yoon.

⁸ Maay dajeek yeen ni rab wu aay
wu ñu xañi doom,
maay xotti seen mbuuusum xol,
fa laa leen di yàppe ni gaynde,
te rabu àll moo leen di xotat.

⁹ «Israyiloo, yàqu nga,
te maa yor sa wall.

¹⁰ Ana seen buur boog,
ba mu xettli leen ci seen mboolemi dëkk?
Ana seen njiit yi ngeen sàkku woon, ba ne ma:
“Falal nu buur aki kàngam?”

¹¹ Ci biir mer laa la falal buur,
te ci samam sànj laa ko follee.

¹² «Takkees na ñaawtéefi Efrayim,
rënkees na ay moyam.

¹³ Lu mel ni mititu mat moo dikkal waa jii,
te tuy doom ju amul xel,
ba juddu jot, génnul biiru ndeyam.

¹⁴ «Man nag maa leen di musal ci njaniïwa?
Maa leen di jot ci ndee?
Moo yaw ndee, ana say mbas?
Yaw njaniïw laa ne, ana sa tooke?
Fomm làqu na ma!

¹⁵ Efrayim moom, su naatee ci biiri bokkam it,

fa mändinj ma la ngelawal penku*,
 ngelawal Aji Sax ji di uppe,
 bëti ndoxam téju,
 ay teenam déy.
 Kii mooy sëxëtoo ab dencam,
 ak mboolem lu cay alal.»

14

¹ Dees na topp waa Samari,
 nde ñoo fippu ci seen kaw Yàlla.
 Saamar lañuy fàddoo,
 seeni doom, ñu rajaxe leen,
 seen jigéeni wérul, ñu butti.

Dëpp, am njéggal

² Israyiloo, dellul ci sa Yàlla Aji Sax ji,
 fakktaloo nga sag ñaawtéef.

³ Waajal-leen ay kàddu te dellu ci Aji Sax ji,
 ne ko: «Baal nu mboolem ñaawtéef
 te nangul nu,
 nu yékkati kàdduy màggal
 yu wuutu saraxi yékk.

⁴ Asiri du nu xetli,
 ay fasi xare it, dunu ko war,
 te dootunu wax lu nu sàkke sunuy loxo, ne ko:
 "Yaw yaa di sunu Yàlla."
 Li nuy wax kay mooy yaw yaay kiy yérëm jirim.»

⁵ Aji Sax ji nee: «Maay garabal seenug déggadi,
 maa leen di bëggal sama bopp,
 nde mereetuma leen.

* **13:15** 13.15 Wetu penku la réewum Asiri féete woon Efrayim,
 ngelawal penku di taxawe congum Asiri.

⁶ Maay mel nib taw ci Israyil,
ñu focc ni tóor-tóor,
seeni reen sampa ni garabi Libaŋ,
⁷ car ya law, yànj nig oliw,
xeeň ni gottub Libaŋ.

⁸ Nooy délsi, keppaaro ko,
dellu ji, pepp dundaat.
Daňuy giir nig reseň,
am bayre ni biiňu Libaŋ.

⁹ Yeen Efrayim, lu ma masa séq ak jëmmi tuur?
Man maa leen di nangul, di leen wattu,
di leen keral ni garab gu naat gu dul ruus,
sa meňñeef bawoo fi man.»

¹⁰ Ku rafet xel, na dégg lii,
kuy ràňnee na ko xam.
Yooni Aji Sax ji kat day jub,
te kuy jubal jaare ca,
ab jàddkat moo cay térëf.

**Kàddug Yàlla gi
Wolof Bible 2020 revision.
La bible en wolof, revision 2020**

copyright © 2010, 2020 La Mission Baptiste du Sénégal

Language: Wolof

Dialect: Regional Wolof

Translation by: La MBS

For complete copyright statement, please see <http://sng.al/copyright>

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-07-22

PDF generated using Haiola and XeLaTeX on 22 Feb 2024 from source files dated 23 Jul 2020

eb088fb7-76e3-5c5f-ab35-a0da6cd8fd40